

AUTONOMIA

I 50 egn del Secondo Statut e i Ladins

Mingol de storia del percors fat a nivel politich per ge dèr ai ladins te la provinzia de Trent i medemi deric de chi te la provinzia de Busan

L secondo Statut de Autonomia, de chel che ch'est an vegn recordà e festejà i 50 egn, per Fascia l é stat tanche na gran ciavatèda, amancol te n prum moment. Da na man l era jit perdù i medemi referimenc normatives che i fascegn aea tel Prum Statut ensema con Gherdena e Badia – enceben che chisc i era stac metui en esser demò te Busan – e apede l à volù dir ence vegnir a se troèr te n'autonomia provinzièla olache i deric desche mendranza ladina i era de facto descognosciui. Restaa demò un referiment a nivel de Statut, l nef articol 102 che l dijea: «Le popolazioni ladine hanno diritto alla valorizzazione delle proprie iniziative ed attività culturali di stampa e ricreative, nonché al rispetto della toponomastica e delle tradizioni delle popolazioni stesse. Nelle scuole dei comuni della provincia di Trento, ove è parlato il ladino, è garantito l'insegnamento della lingua e della cultura ladina».

Dut chest l era ben pech respet a Gherdena e Badia olache vegnia pervedù:

1. la conferma de la scola paritetica (col talian e todesch) e col insegnament del ladin te duc i livie;

2. la prezedenza ai ladins te la scoles e ti posc de lurier publics;
3. l raprezentant ladin de derit te Consei provinzièl e regionèl e ti organs istituzionèi raprezentatives.

Ma coche se disc «no l é n mal che no sie n ben» e belapontin da chesta neva situazion, per i ladins de Fascia l é ponta via na neva sajón de rivendicazions.

Jà del 1973 vegn metù su l grop politich «Ladins» con n program che en curt l volea arjonjer belapontin chi deric descognosciui:

1. l raprezentant ladin de derit te Consei de la Provinzia de Trent e de la Region;
2. la scola paritetica ence per Fascia con prezedenza per i insegnanc ladins;
3. l Comprenjorie Ladin de Fascia destacà da Fiem, ajache a Trent l era jà stat pervedù per lege (1967) n Comprenjorie unich per Fascia e Fiem.

Da aló inant Fascia l'ha semper lurà a nivel politich a duc i livie, dai Comuns a la Provinzia e a la Region,

e enceben che no semper l moviment ladin l aessa abù si raprezentanc drec te la istituzions e niencie te la maoranza, l é semper stat bon de portèr inant argomenc per tegnir avert l confront e l debatit politich e portèr inant i ideèi, i valores e i obietives che ge stajea più a cher e a chesta vida, con chesta sort de lurier, i resultac col jir del temp i é ampò rué:

- 1975: l é stat metù su con lege provinzièla aposta l Istitut Cultural Ladin «Majon di Fascegn» (L.P. 29/1975);
- 1976: l é stat aproà la lege de scomenzadiva populèra per l recognosciment territorièl di ladins de Fascia: aldò de passa 1000 sotscrizions toutes su da la Union di Ladins de Fascia l é stat aproà la lege provinzièla che disc: «I Comuni della Provincia di Trento dove si parla il ladino sono: Campitello, Canazei, Mazzin, Moena, Pozza, Soraga e Vigo di Fassa» (L.P. 19/1976);
- 1976-77: l vegn aproà desvalives provedimenc che perveit l insegnament del ladin te la scoles de Fascia;

- 1977: l vegn recognosciù ofizialmenter l Comprenjorie Ladin de Fascia C11 (L.P. 16/1977);
- 1983: l moviment ladin porta a la costituzion de la Union Autonomista Ladina e ai 15 de november Ezio Anesi doventa l prum conseier provinzièl ladin a Trent con n gran numer de stimes ciapèdes te val; sobito do rua la lege su la toponomastica ladina e la lege per i finanziaemenc a la cultura ladina (1985);
- 1993: rua la normes de atuazion per i ladins de Fascia che perveit l ladin desche lengaz ofizièl, la prezedenza per i posc publics e la declarazion de partegnuda en ocasion del dombrament;
- 1996: Bepe Detomas vegn lità a Roma desche prum deputat ladin e de grazia a so lurier, del 2001 vegn metù tel Statut de autonomia (art. 48) l conseier ladin fascian de derit tel Consei provinzel de Trent e te la Region.
- Te chisc ultimes 20 egn, de grazia al lurier politich de la Union Autonomista Ladina, l é vegnù portà inant e aproà desvaliva normes entornvia l lengaz, la scola e la istituzions sibe a nivel provin-

zièl che regionèl ma l'ultima segur de gran valuta ruèda adalèrch – per endrez amò n'outa de Bepe Detomas – l é la Lege Costituzionèla nr. 1 del 2017 che al articol 8 la recognosc l Comun General de Fascia e ades, aldò de chesta norma, l troon ence tel Statut Spezièl de Autonomia de la Region Trentin – Südtirol (Art. 102).

L status costituzionèl del Comun General l é na gran conquista ajache chest ent no l é bele na «comunità di valle» desche tel rest del Trentin, ma doventa na istituzion che val tanche n Comun, enceben con desvaliva e con de outra funziions. L CGF donca l pel se raportèr direttament coi etres enc, sibe co la Provinzia, che co la Region, che ence belapontin coi Comuns. Da chiò inant pel peèr via na neva piata de storia per i ladins de Fascia, duta amò da scriver... Aboncont lasciamè dir che anchecondi fosc, enceben che con duc i recognoscimenc rué, l é semper amò una la costion da meter dantfora: l'unità di Ladins de la Dolomites.

Riccardo Zanoner Zigher